

**Kalaallit Nunaanni sulinermi ajoqusernermut isumannaarineq pillugu
inatsisip allanngortinneqarnissaanut inatsit**

**(Nalunaarutiginninnermut malittarisassanik naligiissarineq, sulinermi ajutoornerit
il.il. pineqartillugit akuersaarnissamut apeqquummik nalilersuineq)**

**Pillugu
Inuussutissarsiornermut Aatsitassanullu Ataatsimiititaliap**

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliaq suliarinninnermini (kingullermik) ukuninnga inuttaqarpoq:

Inatsisartunut ilaasortaq Karl Tobiassen, Siumut, Siulittaasoq
Inatsisartunut ilaasortaq Bentiaraq Ottosen, Atassut, Siulittaasup tullia
Inatsisartunut ilaasortaq Kristian Jeremiassen, Inuit Ataqatigiit
Inatsisartunut ilaasortaq Mikivsuk Thomassen, sinniisoq, Inuit Ataqatigiit
Inatsisartunut ilaasortaq Lars Poulsen, Siumut
Inatsisartunut ilaasortaq Kuno Fencker, Siumut
Inatsisartunut ilaasortaq Pele Broberg, Naleraq

UKA 2024-imi ulloq 1. oktober 2024-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaanni sulinermi ajoqusernermut isumannaarineq pillugu inatsit kingullermik 2018-mi allanngortinneqarpoq. Inatsisissatut siunnersuutip saqqummiunneqartup akuersissutigineqarneratigut Kalaallit Nunaanni sulinermi ajoqusernermut isumannaarineq annertunerusumik nutarterneqarnissaanik malitseqassaaq.

Siunnersuutikkut sulinermit atatillugu ajutoortut tamarmik ajutoornerisa sulinermi ajutoornertut akuersarneqarnissaanut periarfissaq annertunerulersinneqassaaq tamatumani aamma siunnersuutikkut sulinermit atatillugu ajutoorneq timikkut imaluunniit tarnikkut ajutoornertut akuersarneqarsinnaanngornissaanik inatsit malitseqassalluni. Maannakkut inatsimmit atuuttumit annertunerusumik inuup ajoquserneri qaangiuttussat aamma siunissami annertunerusumik sulinermi ajutoornertut akuersarneqarsinnaalernissaanik siunnersuut

malitseqassaaq. Aammattaaq aningaasannortitsinermit nutarsaasoqarnissaa siunertarineqarpoq, ajoqusersimasullu tamarmik piffissamut naleqquttumik inississimaffigisamik aallaaveqartumik taarsiissutigisassanik naatsorsuiffigisarnissaat siunertarineqarpoq. Tamatumani aamma taarsigassarsiat aningaasannortinneqarnerannut naleqqersuutit akinik naleqqussaanermik ilaqartinneqassapput.

Taamatuttaaq aamma siunnersuutigineqarpoq, Kalaallit Nunaanni sulinermit ajoqusernermi isumannaarineq pillugu inatsit malillugu sulinermit ajoqusernermi nalunaarutiginninnermik suliaqartarnermut aamma ajoquser tup ikiorsiissutinik pisinnaatitaaneranut piffissaritat inatsisitigut aalajangerneqartut atorunnaarsinneqassasut.

Suliassat suliarineqartarnerannut piffissamut anguniagaq pisariitsumik ersarissumillu aqunneqarneranut atatillugu anguniakkat Arbejdsmarkedets Erhvervsikringi ilanngullugu annerusumik eqaannerusumik pisariinnerusumillu ingerlatsissinnaalissavai.

Tamatuma avataatigut siunnersuummik pingaarnertit ukuupput:

- Siunnersuutigineqarpoq, Kalaallit Nunaanni sulinermit ajoqusernermut isumannaarineq pillugu inatsit malillugu, nalunaarutiginnittarneq pillugu malittarisassat allannortinneqarnissaat, taamaalillutik Kalaallit Nunaanni sullivinni avatangiisit pillugit inatsit malillugu nalunaarutiginninnermut malittarisassanut annertunerusumik assingulerlutik.
- Aalajangiussinermik aalajangiussaasimasunik tamanik nalilersueqqinnissamut Arbejdsmarkedets Erhvervsikringimut aqutissiuineq
- Aamma siunnersuutigineqarpoq, sulinermit ajoquserneq pillugu suliani akiliisitsinissamut piumasaqarsinnaaneq pillugu aalajangersakkamik atuutilersitsisoqassasoq, tunisassiap ajoquteqarnera pissutigalugu, taamaalilluni tunisassior tumut imaluunniit akunnermiliuttut niuertumut, tunisassianut akisussaaneq pillugu malittarisassat malillugit taarsiinissamut akisussaaffeqartumut akiliisitsinissamut piumasaqarneq periarfissaalerluni
- Sillimmasiisarfik akiliisinnaajunnaaraangat imaluunniit sulinermit ajutoornermut sillimmasiissutinik ingerlatsinissamut akuersissummik arsaarneqaraangat, sulinermit ajutoornermut sillimmasiinermik aqutsinerup Erhvervsikringimiit ajutoornermut sillimmasiisarfinnut Garantifondimut nuutsinneqarnera
- Tamatuma avataatigut Kalaallit Nunaanni sulinermit ajoqusernermut isumannaarineq pillugu inatsit nutarsarneqarnissaanik paasiuminarsarneqarnissaanillu siunnersuuteqartoqarpoq

Siunnersuutip Inatsisartunit siullermeerneqarnera

Siunnersuut siullermeerinninnermi annertuumik taparserneqarnera ataatsimiititaliamit maluginiarneqarpoq.

Siunnersuutip imarisaa tunuliaqutaalu naammagisimaarneqarput. Siunnersuut ataatsimiititaliami susassaqtumi suliarineqarnissaa partiinit tamanit kissaatigineqarpoq.

Tusarniaanermi akissutit

Kalaallit Nunaanni sulinermi ajoqusernermut isumannaarineq pillugu inatsisissap allanngortinneqarnissaa tusarniaanermut piffissami 17. novemberimiit – 30. december 2023-mut ingerlanneqartussamut tusarniaassutaasunut nittartakkami kalaallisoortaa ikkunneqarsimasoq Sullivinnik Nakkutilliisoqarfiup tusarniaanermut oqaaseqaatimini allassimasoq ataatsimiititaliamit maluginiarneqarpoq. Ajoraluartumik kukkunikkut tusarniaaffigineqartussanut tamanut ataatsikkut inatsisissatut siunnersuut nassiunneqarsimangilaq, taamaammat inatsisissatut siunnersuut piffissami 22. aprilimiit – 23. maj 2024-mut tusarniaassutigineqaqqippoq. Inatsisissatut siunnersuut, upernaakkut 2024-mi tusarniaassutigineqartoq, tusarniaassutaasunut nittartakkami, inatsisitigut aalajangikkatut killissarisani atorunnaarsitsineq ajoqusersimasullu piffissami taarsiissutit aningaasannortinnissaannut ingerlaavartumik taarsiissutinik pissarsisinaanissaannut inatsisitigut tunngavissat atuutilersinnerisigut pillugit kalaallisut allanneqarnerani pingaarnerusutigut oqaasertaat assigiipput.

Ataatsimiititaliaq siunnersuummik matuminnga suliarinninnermini atugassatut tusarniaanermut akissutit assilinerinik pissarsiniarpoq. Tusarniaanermik akissutit innersuussutigineqartut Naalakkersuisut tusarniaanernut nittartagaanni¹ takuneqarsinnaapput. Ataatsimiititaliap Naalakkersuisunut eqqaasitsissutigissavaa Inatsisartut Siulittaasoqarfiata iluseritassatut piumasaqaatai naapertorlugit tusarniaanermut akissutit inatsisissatut siunnersuutinut Inatsisartunut suliassannortinneqartunut ilanngunneqartartussaammata

Inatsisissatut siunnersuummi anguniagarineqartut tusarniaanermut akissutigineqartuni oqaaseqaatigineqartut ernumassutigineqartullu inatsisissatut siunnersuummit anguniarneqartut naammattumik allaaserineqarsimasut ataatsimiititaliattaq isumaqarpoq. Taamaammat tusarniaarnerup ingerlanneqarneranut annertunerusumik oqaaseqaqqinnissamut ataatsimiititaliaq pissutissaqarsorinngilaq.

Ataatsimiititaliap siunnersuummik suliaqarnera

Siunnersuut Inatsisartuni siullermeerneqarnerani amerlanerussuteqartunit taparserneqarnera ataatsimiititaliamit maluginiarneqarpoq.

Kalaallit Nunaanni sulinermi ajoqusernermut isumannaarinerneqartut inatsisip nutarsarneqarnissaa ataatsimiititaliamit pingaartinneqarpoq.

Inatsisissatut siunnersuutip massakkumut atuuttumut naleqqiullugu sillimmasersimasunut

¹ https://naalakkersuisut.gl/-/media/horinger/2024/04/2504_arbejdsskadesikring/svar/hoeringssvar.pdf

aralitsigut pitsannguutininik imaqartoq ataatsimiititaliamittaaq isigineqarpoq.

Ataatsimiititaliamit immikkut maluginiarneqarpoq inatsisissatut siunnersuummut nutaamik § 6, imm. 2-mik ikkussisoqarnissaa siunnersuutigineqartoq, tamatuma kingorna inuup ajoqusernera timikkut imaluunniit tarnikkut ajoqusernerusinnaasoq aamma ataavartuusinnaavoq imaluunniit qaangiuttussaasinnaalluni, takuuk imm. 1. ersarissaatigineqarpoq.

Taamatuttaa inuup ajoqusernera qaangiuttusaaq annertunerusumik sulinermi ajoqusernertut akuersaarneqarsinnaalissaaq.

Soorluttaaq ataatsimiititaliamit maluginiarneqartoq siunnersuummit qulakkeerneqarmat, ajoqusersimasut tamarmik piffissamat naleqquttumik inississisimaffigisamik aallaaveqartumik taarsiissutigisassanik naatsorsuiffigineqartalersarnissaat.

Siunnersuutikkut naammagittaalliornermut aaqqiissummik pisariunnginnerusumik pilersitsisoqarniarnera Naalackersuisunit ilisimatitsissutigineqarmat ataatsimiititaliamit maluginiarneqarpoq, taamaaliornikkut siunissami Arbejdsmarkedets Erhvervssikringi aalajangiussaasimasunik pitsaaneruserumik nalilersueqqissinnaalissallutik.

Inatsisip malitsigisaanik inatsisitigut allannguutit eqqumaffigineqalernissaat pillugit Naalackersuisut paasisitsiniaanissamik aallartitsinissaannik ataatsimiititaliamit kaammattorneqarput.

Siunnersuutip aningaasatigut kingunerisassai

Siunnersuutip piviusunngortinneqarnerani aningaasaqarnikkut kingunerisassat siunnersuummut nalinginnaasumik nassuiaatini allaaserineqarput.

Pisortanut inatsisissatut siunnersuutaasumit aningaasaqarnermi kingunerisinnaasat tamarmiusut taasariaqanngitsutut missiliutaapput.

Taamaattorli ukiup ilivitsup ataatsip iluani aningaasatigut kingunerisinnaasaannik peqarsinnaassaaq. Taamaattorli aningaasartuutit appariarnissaat imaluunniit amerleriarnissaat pineqarnerisut siulittuutigineqarsinnaassanngillat. Inatsisissatut siunnersuut, ukiut arlallit ingerlaneranni agguaqatigiissillugu 100.000 kr.-t tikillugit aningaasartuutini annikitsumik appariarnermik nassataqarsinnaaneri annertuumik nalornissuteqarfigalugit missiliuutigineqarput.

Kalaallit Nunaanni inuussutissarsiorfimmut inatsisissatut siunnersuummi aningaasatigut kingunerisinnaasat tamarmiusut annikitsuaraassasut missiliuutigineqarput. Taamaattorli ukiup ilivitsup ataatsip iluani aningaasatigut nikerarnerit pisinnaasassapput. Taamaattorli aningaasartuutit appariarnissaat imaluunniit amerleriarnissaa pineqarnerisut siulittuutigineqarsinnaassanngillat. Inatsisissatut siunnersuut, ukiut arlallit ingerlaneranni agguaqatigiissillugu Kalaallit Nunaanni inuussutissarsiorfimi ukiumut 400.000 kr.-t tikillugit aningaasartuutini annikitsumik appariarnermik nassataqarsinnaaneri annertuumik nalornissuteqarfigalugit missiliuutigineqarput.

Siunnersuutip aningaasatigut allaffissornikkullu kingunerisassai pillugit allaaserisat tusaatissatut ataatsimiititaliamit tiguneqarput.

Ataatsimiititaliap inassutai

Ataatsimiititaliap isumaqatigiittup siunnersuutip akuersissutigineqarnissaa inassutigaa

Tamatut oqaaseqarluni isumaliutissiissummillu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.

Karl Tobiassen
Siulittaasoq

Bentiarq Ottosen
Siulittaasup tullia

Mikivsuk Thomassen

Kristian Jeremiassen

Lars Poulsen

Kuno Fencker

Pele Broberg